

四庫全書

子部

欽定四庫全書

子部

古今事文類聚遺集卷五

詳校官中書臣沈颺

侍讀臣孫球覆勘

總校官編修臣王燕緒

校對官中書臣王家賓

謄錄監生臣徐錫福

欽定四庫全書

古今事文類聚遺集卷五

元 富大用 撰

國史院部遺

提舉實錄院

編修實錄附
此下補新集

史院史官之後

歷代沿革治平元年以宰臣韓琦提舉修仁宗實錄熙

寧元年以宰臣曾公亮提舉修英宗實錄

後該准此
見會要續

會要紹興初實錄國史皆寓史館後罷史館遇修實錄

即置實錄院遇修國史即置國史院九年二月以修
神宗哲宗徽宗實錄始置院以宰臣一員提舉修撰
檢討官無定員檢討官以本省官或他官兼而修撰
官如史館例

詔將史館前廳充實錄院
作角門通過史館併秘書

十二年詔

史館提舉諸司承受等并官吏並併歸實錄院以罷

史館也

中興
會要

古今事實

世謂董狐

唐吳兢與劉子元撰定武后實錄敘張昌宗誘張說誣
魏元忠事頗言說已然可賴宋璟等激勵苦切故轉禍
為忠後說讀之知兢所為屢以情斬改辭曰徇公之情
何名實錄卒不改世謂今董狐

本傳

聖朝大典

至德二年史館太常少卿于休烈奏國史實錄聖朝大

典續通

訪求事迹

李益能撰蔡密禮行狀重修神宗哲宗兩朝正史公奏
神宗實錄墨本元祐所修已是成書朱本蔡卞重修多
所增損而元祐史官語言無不過失實乞將朱墨本參
照修定哲宗實錄蔡京提舉編修多是增飾誣言變易
是非殆非實錄之體乞於舊臣之家訪求當時文字事
迹參照上悉如所請

宋會
要

古今文集

雜著

辭免升同修國史實錄院同修撰奏狀

周必大

殊渥薦加危衷增厲伏念臣本疎文藝尤乏史才攝事
玉堂已慙於舊直計員金鑄更假於新榮名稽敘進之
規實溢同升之數昔劉子元居秘書而領史事自矜又
處於載言賀知章遷儀曹而兼集賢士論共榮其闕

臣學非二子而寵萃一時雖出誤知難安愚分儻不量
牛馬之走乃或冒熊魚之兼必嘖煩言上辜洪造願俯

從於固避庶無負於曲成

辭免實錄院同修撰奏狀

洪邁

聞命震驚罔知所措眷史筆之重任極昔賢之所難况在於臣無能為役豫編摩之列曾莫補於毫分新論撰之官乃頓躋於位次惟欽廟一堂之典有著庭累歲之功藉日厯之既成奉雲章之改作畀之兼職已愧竊榮優以隆恩故難虛受伏望皇帝陛下軫聰明而下逮念名實之相孚察其所安俾纘舊服庶少逃於官謗以上

答於特知所有恩命臣未敢祇受

修玉牒官

提舉檢討
官並附

歷代沿革歷代玉牒官無定員掌修皇帝玉牒凡編年

以帝紀帝系而載其歷數及朝廷政令之因革者為

之

會要

唐本宗正之職開成後始別置修玉牒官宋淳

化六年始設局置官倣唐制也詔以皇宋玉牒為名

建玉牒殿于新寺九年以知制誥劉筠夏竦為修玉

牒官自後置一員或二員

朱勝非秀水閒居錄本朝
圖書嚴奉寶藏未有如玉

牒者用金花紅羅標黃軸至神宗朝以軸大難於披閱詔為黃金梵夾又以黃金為匣鎖鑰皆金也進呈畢安奉於宗正寺玉牒殿士大夫罕有知其制度者予頃在朝廷因宗正丞謝汲自本寺事論及玉牒問宰執諸公制度趙元鼎曰不過刻如玉冊耳予曰國家宗支之蕃自古無之每朝為一牒宗室官稱名行女與其夫皆錄之以王刊不其難乎又中興系年錄注每朝為一牒乃載人主系序及歷年行事如帝紀而差詳其後附以皇后事迹親王宗室子女則有宗蕃慶系錄仙源類譜仙源積慶圖三書詳焉非同為一牒也玉牒則奉安於玉牒殿景祐元年宗正寺類譜則安于屬籍堂勝非亦少悞

修玉牒官李淑申請詔以編修院廳西閣子充修纂

玉牒之所

李淑言前修玉牒官馮允亦是兼編修會要蓋緣國史玉牒事節須要照會所以只

就編修
院修纂

熙寧三年玉牒于三班院置局後徙編修院

皇帝玉牒十年一進修玉牒官並以學士典領自元
豐行官制分隸宗正寺官六年詔宗正寺修玉牒照
用日歷所文字並指定所書事令本所節錄元符二
年宗正寺丞陳覺民乞將先帝玉牒內聖政令本寺
修玉牒官抄寫封送國史院從之紹興十二年襲舊
制始建以宰臣一人提舉修玉牒官一人以侍從兼
凡宗正卿少而下悉與修纂二十九年詔玉牒所

併入宗正寺更不置修玉牒官檢討官以本寺少卿
及丞同領編修事詔玉牒所宰臣提舉依舊修書官
一員同宗正卿丞修纂更不置檢討官

中興
會要

紹興三

十二年詔尚書左僕射陳康伯提舉編玉牒後或以

參知政事簽書樞密院事兼權提舉

乾道元年錢瑞
禮以參政兼權

蔣韋以簽樞兼權
見玉牒所題名記

故事玉牒以首相領之自後相府

有闕則以首參兼領仍帶權字淳熙十五年王丞相
淮去位周益公以右揆兼領時勅令所纔罷而首參

仲至無兼局益公乃奏乞以仲至權提舉玉牒宰相
在位而執政權領寶訓玉歷自此始也

羣書要語生必輝名於玉牒

古今事實

特創嘉名

唐開成二年修玉牒官李衢奏切以聖唐玉牒與史冊
並驅立號建名期於不朽伏乞付宰臣商量於玉牒之
上特創嘉名以光帝籍敕旨宜以皇唐玉牒為名

重修玉牒

宋朝趙安仁重修玉牒屬籍請依唐室故事修玉牒官

奏劉筠夏竦宋綬等為之

真宗實錄

初梁周翰始創其制而

未備安仁重加裁定又為仙源積慶圖皆統列精簡焉

殿名玉牒

別籍有五

並見宗正卿門

古今文集

雜著

禮部代宰臣以下進三祖下第六世仙源類譜

仁宗皇帝玉牒賀表

呂伯恭

天發慶源衍皇文而有永國嚴大典章烈祖於無疆令

日再蠲上儀交舉

中賀

竊以建邦啟土胄本出於神明扶

世導民德實參於化育厚苗裔之憑藉培運歷之靈長

炎宋肇興上通元造昭陵在御專以至仁垂光覃被於

雲來流澤涵濡於億兆厥開真主並輯曠文譜增屬籍

之華牒冠史臣之錄發揮昌緒見太宗小宗之蕃申載

宏綱示特書屢書之重源流綜貫典冊崇成繇宣祖以
來咸星羅於霄極若明道而後實日靖於鴻圖振振信
厚之風皞皞泰和之治銀潢汎漾玉版閱嚴千八百國
之封先乎異姓五三六經之籍展也同符懿鏹龐洪函
生闡懌恭惟皇帝陛下隆恩睦族駿惠紹基帝繫繇延
監枝葉本根之輔皇猷渾灝思規模桀矧之尊式是不
彛對于華旦臣等參聯庭寀親覩邦祺聖統聿傳陋柳
芳永泰之譜休聲遠繼賡唐介慶厯之詩

代宰臣以下進三祖下第六世仙源類譜畢賀

太上皇帝表

呂伯恭

清都絳闕固高視於羣生寶系璿源實功資於太極告
成典冊垂裕仍雲中賀竊以顙穹生民濬發皇宗之盛丕

天大律於昭帝繫之嚴顯允熙朝肇開聖統德隆澤厚
命既僕於萬年胄遠族蕃譜方登於六世戚疎區別昭
穆派分雖國論民言不至齋心服形之地然宗盟家政
猶闕問安視膳之時爰練日以龜從咸望雲而鰲抃驩

騰需贖慶集叢霄恭惟太皇帝陛下淵靜化元希夷物
始大綱授舜既蕩蕩以無名九族睦堯本親親而有敘
光宅穆清之邃具膺蕃衍之祥臣等幸際休辰與觀盛
事中興功業斯干詠輯於弟兄百世本支陳錫永觀於
孫子

代進玉牒表

張孝祥

帝系勒鴻燦科條於屬籍聖謨啓佑嚴訓典於寶儲御
巖廊以觀成拱朝班而稱慶臣切以堯統漢緒肇派別

於天潢周誥商盤麗光躔於東壁惟昭穆親疎之有序
與文章號令之常傳歷時浸闕於編摩甫歲悉加於纂
輯必親經財幸稽春秋簡牘之義故並建殊尤若河洛
圖書之出皇帝陛下慶綿景祚志通光猷世茂本支襲
生民之尊祖道昭嗣服成下武之繼文考仙宗皆聚此
書述遺烈永為大訓臣等猥蒙際遇快覩休嘉麟趾振
振共仰宗盟之益茂虞書渾渾更瞻聖作之相輝

辭免提舉編修玉牒劄子 周必大

臣欽承恩渥增震孤衷伏以紀謨烈以示後人繫本支而綿百世鏤牒本繇於唐代成書獨備於聖朝粵自中興尤嚴故實雖承乏或容於次輔而提綱當俟於元台豈伊具臣堪此衆職矧有僚之不廢在虛次以何嫌仰冀皇明俯昭愚悃免與聞於大典姑曲徇於小廉冒瀆天威臣無任戰栗俟命之至

辭免玉牒所檢討官狀

吳永叔

渙渥昭回孤衷惕厲伏念某素疎文藝尤乏史才直紫

薇垣既近日星之麗，鏤白玉牒，復疏雨露之榮。學不足以網羅舊聞，識不足以登記大典。粵考高廟中興之際，暨觀光宗嗣服之初，孝祥以柱史兼官，官名始稱樓鑰。以月卿貳事事體，方隆豈宜卑陋之蹤，輒與討論之末。覽書之十格，欲纂述以無能，視作者七人於同升而有愧。雖官微不應控避，然恩重恐速顛隲，所有成命，免令兼攝。

修日厯官

歷代沿革唐正元初韋執誼奏撰私家紀錄非是望令
各撰日歷月終館中詳定從之此日歷所從起也

葉伯

益宏詞
編題

宋舊以宰臣兼監修國史修撰直館檢討無

常員掌修日歷以時政記起居注會集修撰為一代
之典舊於門下省置編修院專掌國史實錄修纂日
歷元豐四年廢編修院歸史館官制行屬秘書省國
史案六年詔秘書省長貳毋得預著作修纂日歷事
進書即繫銜以防漏泄如舊編修院法焉八年詔史

部郎中魯肇禮部郎中林希兼著作職事官兼職自
此始元祐五年移國史案置局專掌國史實錄編修
日歷以國史院為名隸門下省更不隸秘書省紹聖
二年詔日歷還秘書省宣和二年詔罷在京修書諸
局惟秘書省日歷所係元豐國史案除著作官專管
修纂日歷之事無定員外其元豐分案編修日歷書
庫官吏並依元豐法

四朝志

紹興元年以修日歷所為

名又詔秘書長貳通行修纂日歷

以少監程俱言長貳於條不與修纂

欲準元豐故事著作官闕從本省時暫牒校書郎或正字兼權所責不廢編修故有是命三年詔

左僕射呂頤浩兼提舉修國史

時修日曆張綱言秘書省權輕難以取會

又孫近言景德二年王旦為相領史職乞宰府提舉故有是命

詔修日曆令侍從官

帶史館修撰餘官帶直史館史館檢討若著作郎佐郎

闕依元豐例差郎官兼領

時以祠部郎虞滢兼大著禮部郎舒國清兼小著

日曆所以修國史日曆所為名四年詔修國史日曆所以史館為名依舊制置編修校勘官十年秦檜請下有司討論史館建併之弊禮部看詳於元豐舊制

併歸秘書省國史案以著作郎佐郎修纂日厯遇修
正史即置國史院遇修實錄即置實錄院見今修淵
聖及今上日厯今宰相提舉以監修國史繫街實錄
院以提舉實錄院繫街

古今事實

蔣氏日厯

唐柳芳作唐厯大厯以後闕而不錄宣宗詔蔣偕等分
年撰次盡元和以續云自乂至僭三世踵修國史世稱

直筆咸云蔣氏日歷

無以易藻

宋朝汪顯謨藻字彥章公言自元符以來並無日歷此國之重事願留聖心上納之既而宰執請擇所付上曰無以易藻矣出知湖州詔領日歷如故辟官屬二員且賜史館修撰餐錢

古今文集

雜著

謝賜紹熙四年厯日表

周必大

歲運無窮裁成宥度王春有倂誕告庶邦吏拜賜以承
流民知時而趨事臣某

中謝

恭惟皇帝陛下道參覆載職

備義和天畏棐忱式九圍而順帝星隆晷德齊七政以
授人凡叨守土之官咸起競辰之志臣敢不頒宣詔璽
勸勉農疇在厯數於舜躬孰能推步暨朔南之禹教尚
覲混同

謝賜厯日表

周必大

欽承天道初觀玉厯之成謹授人時均下璽書之賜仰
祇德意俯佩恩榮中謝恭惟皇帝陛下輔相兩儀總齊七
政大法協於五紀克敘彛倫閏月定乎四時靡乖躔次
推本聖心之自蓋先民事之宜故此遐方亦頒密度臣
敢不深思奉順務稱嚴恭東作西成行見京坻之積南
洽北暢豈惟正朔之同

同前

周必大

欽崇天道課玉厯於清臺謹授人時下璽書於方國凡

任承流之責舉深拜賜之榮中謝恭惟皇帝陛下功錫禹

疇德齊舜政炎圖載赫既聰明睿智以有臨皇極用成

宜歲月日時之無易申命居卿之職載嚴頒朔之文天

始地終得大衍自然之數珠聯璧合驗太初最密之祥

誕告多方用興嗣歲臣敢不仰推聖意徧諭封圻九敘

惟歌使咸知於帝力三時不害期各厚於民生

同前

周必大

日官推數當五年再閏之期王者頒常下三統四分之

歷凡叨守土敢怠承流恭惟皇帝陛下把握陰陽彌綸
天地授泰元之神筴協洪範之彝倫水火金木惟修坐
致九功之敘歲月日時無易預知百穀之成爰即上春
徧頒宥度豈特新又新而無弊蓋將朔復朔以何窮臣
一分銅虎之權三拜璽書之賜年運而往竊自驚齒髮
之衰民愚而神願謹示農桑之候

同前

周必大

參萬歲以成純方行無疆之數以四時而為柄用頒有

截之區望雲祇拜於君恩愛日益勤於吏事

中謝

恭惟皇

帝陛下德隆廣運化本密庸仰膺申命之休俯謹授時
之政地法天而天法道據四大以宅中正次王而王次
春殖萬民而布治况歲直金穰之次而厯符璧合之祥
農力穡以無違吏窺文而竊抃臣敢不勤敷聖意徧諭
部封時和年豐顧已示夢魚之兆家給人足愧莫施汗
馬之功

謝紹興十四年厯日表

洪邁

清臺課密上元新甲子之符支郡頒常正月謹王春之
政拜恩喜幸開卷遵行

中謝切

以觀乎天文有寒暑殺生

之候考之人事戒析因夷隲之期既水火金木土穀惟
修故度量權衡歷算遁出居陽而治振古如斯洪惟有
道之朝高視無前之蹟南司北正稽顙帝以建官東作
西成憲唐堯之分命爰暨照臨之內舉由輔相之宜恭
惟皇帝陛下與日並明參天施教執玉帛者萬國罔不
率從班正朔於八荒無有遠邇永念承流而宣化宜思

利用以厚生畀茲一卷之書俾成四時之吏臣敢不審
其作輟奉以周旋夜寢夙興雖莫知於帝力春耕秋斂
誓勉相於農功

福州謝厯日表

洪邁

課自清臺雖朝廷之故事命于方國蓋天子之至恩拜
賜為榮窺文何幸切以朞三百六旬有六日事蓋備於
唐堯律八十一寸則一分法益嚴於漢武考輔相裁成
之道戒析因夷隲之宜皆聚此書以前民用恭惟皇帝

陛下乾坤合德歷數在躬卜年萬壽以無疆紀號一成而不變神祇祖考既安樂於太平歲月日時又明章於庶證禮勿忘於告朔聖愈謹於占天肆令宣化以承流咸識履端而舉正璿璣不忒玉燭自調臣敢不奉以周旋審其作輟聯珠合璧曾何造化之能知流火授衣尚見艱難之所致

謝歷日表

洪邁

真主當陽載謹占天之義疇人觀象一新底日之文方

中詔之分頒均外臺而重拜

中謝

恭惟皇帝陛下堯身為

度舜歷在躬知天其有五材守而勿失對時而育萬物
動則有成嘗思利用以厚生不急履端而舉正坦然明
白奉以周旋臣敢不祇誦成書虔遵至意七月流火益
知王業之艱難五星連珠莫測聖功之輔相

修日歷劄子

張孝祥

臣聞神宗皇帝相王安石用私意作日錄一時政事美
則歸己陳瓘以死爭之著為尊堯集日錄辨等書忠臣

義士感激增氣恭惟陛下躬履艱難躋登休治寶慈與
儉仁民愛物聖德之盛固已聿追先烈而故相信任之
專禮遇之隆又非特如安石受知於神祖也臣切謂政
事舉措號令設施一皆裁自聖斷故相或能將順贊襄
而已臣懼其作時政記亦如安石專用已意掠美自歸
揜陛下之聖明私羣臣之褒貶日厯之官因取其說著
之簡策殆非尊戴君父傳信萬世之義臣仰惟陛下既
遴選史臣付以論撰欲望駿發明詔再取去歲以前臣

寮修過日歷詳加是正審訂事實貶黜私說發明聖德
庶幾作宋一經襲六為七垂之無窮天下幸甚

辭免修日歷轉官奏狀

周必大

臣聞命若驚措身無所切以舜受堯禪光華二典之中
武承文謨度越三王之上久罕聞於並世今親值於同
時蓋國家甚盛之規實儒學難逢之會而臣猥繇薄技
久竊殊知供奉螭坳預初載史臣之高選周旋麟省窺
兩朝日歷之宏綱逮茲薦履於禁嚴適遇再陳於篇秩

故四周於歲律而疊進於官榮夫何綜覈之朝有此便
蕃之寵自猶知其過矣人豈謂之當然伏望陛下天造
無私日光必照念臣遭逢千一雖與衆同察臣僥倖再
三則惟已獨或遂寢出綸之命或量裁考績之年稍令
私義之安實賴公朝之賜

占天萬年厯序

祝天輔

竊以厯用於世久矣自堯命官以明厯象舜齊政以察
璣衡降是無代無之然由古及今泯泯替替或久或近

間行隨改殆未有能盡歟抑推步籌策有不能精歟國
朝初厯今幾易矣元祐觀天法行之纔十餘年而遽有
晦朔之差姚舜輔以一介草茅卒能指其所失而伸其
所視蓋闔臺之史莫有能屈之者豈非法為世出而人
為時舉者歟新厯來上上既命以占天為名且命臣為
之序臣以區區所聞敢不盡愚臣聞知天之所為知人
之所為至矣苟蔽于天而不知人則溺于吉凶禍福之
說而去就從違必決于此而後行苟蔽于人而不知天

則牽乎是非成敗之迹而可否因革有不待時而舉是則兩失之矣唯聖人不徇天以絕人而知有以修其事業不乘人以誣天而知有以奉其時令故動則獲福為斯得名而影響之應間不容髮者豈預有所推測而致然歟蓋知要而務實則天亦從而畀之矣此以人占天之道也伏惟皇帝陛下道極天人躬包厯數體乾坤之闔闢順陰陽之慘舒其施為注錯方且與天合德而雖先時弗違矣其有孚也於未占而先成其可占也於既

乎而後見則天人幾於一致然猶且先修乎人事而後
占於天所謂知要而務實者不期於天畀而天畀之矣
歷法之修特以考人事之至與未至者爾其精數明時
所以追太初而並大衍且將以建萬世一定之法而為
有宋不刊之典者尚不論也然則臣何以知其然哉楊
子曰史以人占人聖人以人占天觀陛下命歷之名臣
於是乎知臣謹序

修會要官

歷代沿革唐德宗正元間蘇冕始為唐會要四十卷武
宗時崔鉉又續四十卷宋建隆初王溥取宣宗以後
故事并蘇崔所錄共為一百卷本朝會要自建隆止

慶歷四年成一百五十卷

章得象上
王洙編修

王珪續以慶歷

止熙寧十年通舊增損成三百卷總二十一類八百

五十五門

國朝會
要序

乾道四年詔尚書左僕射陳俊卿

兼提舉編修國朝會要五年秘書少監汪大猷等言

蔡攸所修國朝會要除將熙寧十年以前章得象王

珪所修重加刪潤外其自元豐至政和止修得帝系
后妃吉禮三門攸所修吉禮緣當時議論好惡不同
妄有刪改以迎時好乞令本省再加刪定兼今來續
修斷自神宗其五朝會要內有熙寧十年內事亦合
重行編入以續修國朝會要為名從之六年中書門
下省言國朝會要已修至靖康詔今自建炎元年接
續至乾道五年九月秘書少監陳騭言編類建炎以
後會要至紹興三十二年六月十一日成書以中興

會要為名從之

提舉修敕令

詳定官附

歷代沿革宋天聖慶厯嘉祐熙寧編敕及元符勅令格

式各差宰臣提舉

此事見續會要何執中奏而四朝志乃云自熙寧初編修三司令式

命宰相王安石提舉如志所言是自熙寧始也然天聖既有提舉之例不應自熙寧始今姑存之以俟考究
詳定官以侍從之通法令者充政和元年差左僕

射何執中提舉重修勅令執中上章力辭於是不帶

提舉以兼領為名

續會要

建炎四年命宰臣范宗尹提

舉重修詳定敕令至是始設官置局命大理寺及見

在敕局官兼詳定刪定官

中興會要

紹興三十二年

孝宗已卯

位未改元

六月權吏部侍郎徐度等言近措置裒集建炎

紹興已來詔旨專一置局今來所名取自朝廷指揮

詔依舊以敕令所為名

會要

紹定中改為詳定一司敕

令所自建炎四年前著為紹興新法以後續降幾

二萬餘條前後牴牾

職源

乾道四年詔差刑部侍郎汪

大猷兼詳定官理少王彥洪韓元吉兼同詳定官刑

部蔡洸劉芮吏部鄭伯熊戶部曾逮理丞潘景兼刪
定官限一年了畢六年汪大猷奏合行事件請行刪
削於是復置敕令所提舉官銜繫兼詳定一司敕令

詳定官銜繫兼詳定一司敕令並依舊例施行

係考宗會

要修入

此後淳熙慶元嘉泰及今上淳祐各有頒降敕令格式

宋初修軍馬司敕

則屬樞密仁宗時命田況提舉熙寧八年權知審刑
院崔台符言奉詔修軍馬司敕緣軍政事重故事以
樞臣總領於是命樞密使陳升之提舉管勾

續會要

紹

聖元年又詔知樞密院事韓忠彥提舉管勾詳定刪
定軍馬司敕令

古今事實

前律後令

漢杜周為廷尉客有謂周曰君為天下決平不循三尺
法周曰三尺安出哉前王所是著為律後主所是疏為
令當時為何古之法乎

釣金束矢

李延年論刑法第二表周禮鈞金束矢慎之至也

金條玉科

刑法曰金條玉科

牙章竹簡

牙章竹簡之中因以法吏

古今文集

雜著

請修勅令

劉執手

臣竊以法者天下之大命也先王制法其意使人易避而難犯故至簡至直而足以盡天下之理後世法制唯恐有罪者之或失也故多張綱目而民於是無所措其手足矣世輕世重唯聖人為能變通之祖宗之初法令至約而行之可久其後大較不過十年一變法豈天下之大民物之衆事日益滋則法不可以不密歟臣竊以謂非事多而後法密也殆法繁而後姦生也神宗皇帝達因革之妙慎重憲禁元豐中命有司編修勅令凡舊

載於勅者多移之於令蓋違勅之法重違令之罪輕此足以見神宗皇帝仁厚之德哀矜萬方欲寬斯人之所犯恩施甚大也而所司不能究宣主德推廣其間乃增多條目離析舊制用一言之偏而立一法因一事之變而生一條其意煩苛其文晦隱不足以該萬物之理達天下之情行之幾時蓋已屢變今所謂續降者每半年一頒每次不減數帙矣夫法者天下之至公也造之而不能通故行之而不能久其理然也又續降不顯言其

所衝改故官司州縣承用從事參差抵牾本末不應非
所謂講若畫一通天下之志者也臣愚以謂宜有所加
損潤澤之去其繁密合其離散要在簡易明白使民有
避而知所謂遷善遠罪之意伏望聖慈酌時之宜完法
之用選擇儒臣一二有經術明於治體練達民政者將
慶歷嘉祐以來舊勅與新勅參照去取略行刪正以成
一代之典施之無窮

辭免兼勅局劄子

周必大

臣承詔惕息罔知所措竊惟執政之兼書局初無定例
同升或容分領未至奚必曲成今者良臣陳義甚高過
於謙損臣若汗顏代斲獨不愧晉人其下皆遜之語乎
況臣鄙樸無能超踰已甚律設大法懵然弗知將何以
助陛下三章之約贊相臣畫一之講今早已當面奏天
聽未回須至再有陳免伏望聖慈矜臣惶恐不自安之
意特降睿旨俯從所請許仍其舊臣無任懇迫俟命之
至

勅令所題名記

陳居仁

乾道四年冬有司言建炎後續百幾二萬餘條前後例不合請削為書俾吏不得舞詔可之六年秋復置詳定一司勅令所初本朝重令甲每詔諸儒纂修自天聖熙寧元祐以來有詳定編勅所編修諸司勅式所重修勅令所其設局不一最後獨存今名渡江因之而累朝大典用以秩序矣書既屢奏御賞煩費侈官寢冗紹興末例罷去至是始復之然視曩時官省三之一吏胥徒省

三之二凡共億之事又大省惟不務為虛文而典領則並委一二大臣不敢少損焉示三尺重事必有攷其要以詔官府又所置刪定員率資歷未可登他曹則於此乎儲之士得優游其間斂身於防益明習國家憲令以適於務夫謹法度廣賢才上之復是官也抑豈為無旨哉刪定有以他官兼詳定有為同者中又省去今定為提舉官二以屬宰相同提舉一以屬執政詳定一從官為之詳定官五蓋以今為著曹以典領重故也因得附

離姓名于壁淳熙戊申四月記

建隆編勅序

呂伯恭

太祖皇帝受命穆清肇造區夏建隆之元號為天地重
開廼命左右之臣申明憲章論次律令創業垂統為萬
世則越四年七月己卯判大理寺臣儀上建隆編勅四
卷宏規丕矩易簡坦明揭於象魏藏於有司職於秋官
盼於郡國用啟祐後聖繼繼承咸以正罔缺確乎致
治之成法也臣涵泳聖涯固不足以測知乾坤闡闢之

縕然職在翰墨其可以詞語淺薄為解謹齋心極思而序之曰一天下者必不嗜殺人然後定惟五代之亂強陵弱衆暴寡無知之氓奔耆騁欲眎三尺法猶弁髦土梗而大弃之奪攘不忌剽劫顯行上之人厭苦其難治於是為一切之法以求勝民不師古始墮壞先王金科玉條之制相夸以虐相高以險奇請他比溢於几閣黜胥老吏生死於簿書之間猶不能偏識千機萬竅闕民而納之死悍臣酷吏奮髯抵案斬艾擊斷專決不請駢

首就戮血流被道民舉足而蹈陷穽側身而入河海靡
衣餼食不為終日之計時君偃然自以防民之具高視
前世然法出姦生令下詐起姦宄無窮而鈇鉞不足凶
威毒燎腥聞于天上帝震怒崇降罪疾亦罔克永世惟
我藝祖奄受方夏代虐以寬當宁太息思欲滌除苛法
撥亂世而反之正深詔通明平恕之士傳以經誼蔽以
人情成書之布前目后凡較然畫一以四卷之簡而馭
億萬生齒之繁風流篤厚禁罔踈闊斯民安土樂生不

敢以身試法駸駸乎圜空刑措之治矣昔之為法愈多而犯法亦多今之為法愈寡而犯法亦寡昔之防民日嚴而民日慢今之防民日寬而民日謹昔之吏屈首朱墨而不足今之吏從容畫諾而有餘是知為治之道果在此而不在彼也深仁厚澤克開厥後民之戴宋永永無窮後世雖有作者蔑有加於此矣世之議者或謂藝祖之法以威克厥愛為主臣竊以為聖人之用刑若醫者之用藥當疾之初平藥石未可一朝去也必俟元氣

稍勝則藥石稍損元氣俱復則藥石俱捐藝祖拔民於水火之中如疾之初平者也故於前代之刑猶存十一於千百至於後聖教化益明則刑益輕慶厯嘉祐以來鞭笞之罰不上于士大夫實推本藝祖好生之德孰謂其尚威乎臣懼後之有司不察藝祖制法之原謹復列之於末以告來者

刪定官

歷代沿革宋舊刪定無常員大觀三年詔六曹刪定官

併入詳定一司勅令所為一局

四朝志

後省紹興十二

年徐度申請裒集建炎紹興詔旨今專置一局乞權
行復置刪定官以三員為額於行在職事官內差兼
詔依舊以勅令所為名後省乾道六年復置勅令所
汪大猷申請正差刪定官乞繫銜充詳定一司敕令
所刪定官兼刪定官繫銜兼詳定一司敕令所刪定
官淳熙十五年林栗申請廢勅令局刪定官並照淳
熙二年復置局差刪修官三員

古今事實

勅重令輕

宋朝錢象先知律令屢為刑法官預修慶厯嘉祐編勅及州縣諸路條貫常以犯勅者重犯令者輕請移勅文入令者甚衆又嘗議告捕法以為罪有告捕者皆許捕則姦民得依法以害善良因省去許捕之條百餘其持法近厚如此勅成例進勲爵仁宗以其母老有以慰之乃獨賜公三品服

人物為寶

左文林郎刪定官鄭剛中字亨仲引對願下詔不得以
虛名文具欺罔朝廷翌日進呈上曰近所引對多是人
材雖得珠玉珍玩不足以為寶但冀得十數人物乃足
為寶也令學士院降詔出榜朝堂以剛中為左宣教郎
充樞密院編修官

好古識奇

李公麟字伯時用陸佃薦為刪定官公麟博學好古多

識奇字

東都事略

入對三事

勅令所刪定官金安節入對上三事曰人才當長養成就之取其第二奏行下旬日以為司農丞

訪求舊史

汪大猷乞重修法令上極以為已任推舉詳明通練之士以自佐訪求舊史網羅故牘年餘書成孝宗取進本列於選德殿之左右朝夕觀覽

史館校勘

歷代公革兩京新記省內本統經史及太史厯象之職
後並為列曹惟主寫書校勘而已

古今事實

文章召為

宋朝歐陽修以文章冠天下景祐初召試為館閣校勘
釋褐召試

范鎮字景仁成都人舉進士為禮部第一釋褐用參知

政事王舉正薦召試學士院除館閣校勘

古今文集

古詩

勘書

孫僅

儒家無事外招客勘青編筆墨東西置朱黃次第研頻
憂傷點竄細恐誤流傳改易文辭正增加字數全端坐
窮今古披襟見聖賢得興忘昏曉題名記歲年棲毫思
確論廢卷為忘篇魚魯皆刪定誰人敢闕然

雜詩

答曾無疑校勘

劉克莊

詩到黃初字永和半生西望邈明河已招學士來儒館
更欠山人拜諫坡四庫舊書存有幾五朝遺老苦無多
傳聞將講臨雍禮小駐驪駒白玉珂

和鄭讐校

楊炯

銅門初下辟石館始沉研遊霧千金字飛雲五色牋

六曹部遺

六部監門

歷代沿革古無此官宋渡江後紹興二年詔置六部監門官一員從堂除差從人吏部尚書沈與求之請也

尋詔六部長貳踏逐奏差沈與求等舉新平江府通

判董將詔依

中興會要

隸尚書左右選

見中興會要尚書左遷注

內遷

則為寺監丞或權郎外除至有為諸路總領者紹興十年呂郎中希常二十四年蘇寺丞振是也乾道後補外止為州內遷止為寺監簿紹興後又有為添倅

者其遷寢輕矣

古今事實

選文臣充

紹興二年詔置六部監門官一員選陞朝人文臣有才力人充仍令六部長貳奏差

依寺監丞

詔置六部監門官序位請給依寺監丞

掌司門鑰

掌司門鑰之嚴

胡文恭行
呂惟簡制

更司門鍵

古今文集

雜著

六部門官廳壁記

陳國袁

乾道登號之七年厥既庶職咸理共趣平治上思以固
其勤也有詔百執事卯而入盡未而退小大之吏罔不
惟上訓是迪無或敢有佚豫而六部寔天下政事之樞
綱目要領闔闢在是故奉詔益嚴非他攸司比也凡部

官外未之出入疾病之變告與其謁制之可否悉聞諸
部門部門受其出入之時以聽上稽訪門之司存蓋至
是而愈重矣方是時奉行列曹之命以正胥吏之失贊
長貳竟懲決以遵長官之意抑猶其細事也南陽韓君
子厚甚粹而度來居是官始至適遇勤政之詔則遂環
顧其職以謂舉天下之政事悉囿諸六曹職有弛張事
之廢興基焉今隸職於中者操筆疾書略不敢後猶後
羣有司下直而門官者倘不能先時而至眡其出入而

聽其命是亡具也則盡弃去一切恪敬厥事復掇其餘
力以取前任人名氏自董將而下皆書石而鐫之嗚呼
天下之事要毋忽其小者爾昔鄭子產聞盜而為門者
而春秋犯門之誅謂干國紀子厚既盡力門職於古無
愧又補苴罅漏不數於其小者題名蓋其一也斯反而
顧天下事奚難哉官建於紹興之二年法以陞朝有才
力者廼在選而班祿祇寺監丞其自是為丞郎者八十
有五人焉君子謂是官也為要職乾道八年歲在玄默

執除十二月旦日記

續紀

陸垓

部門有官中興初制也凡天下之事隸于部其綱要有六其司存二十有四其間劇易不同皆足以展四體司鑰者止譏其出入奉列曹之命惟謹夜漏未盡僕僕趨局不敢後長貳未退則屏息以俟率是為常雖欲求以自見不可得然則是官豈徒設哉國家官人以身儲才有地其始進而需用於部者有二焉繇京秩則為門官

繇小選則為架閣二官資歷雖殊職閒無事則相似大抵不才用而以才選也嘉禾蔡君開以邑最稱方退就銓得倅黃岡忽有旨改畀廟論以恬靜特獎之益信其選為不輕甫蒞事按求題名之舊歲久員溢書止於王麟闕而不紀向之踵是而得麾節者適致餐錢乃勒堅珉彙次官氏自傳誠以下各謹其歲月俾來者相繼登載若廼因名以跡其實顯晦并沉未容槩論而其卓然著見者亦得以託不朽後之覽者思其所可繼省其

所不逮俛焉日孜孜常恐無以稱上之選毋徒兀兀坐曹諉曰無所事姑眠為進步之階必使所居官繇是大焉斯可矣手指目視是否凜然豈苟以為觀美云嘉定初元臘日記

六部架閣

歷代沿革古無此官宋元豐有六曹架閣庫續會要崇寧

元年何執中為吏部尚書四選按集吏藏于家以舞文取賄執中請置庫架閣命官涖之是後六曹依舊

置宣和二年罷

續會要宣和二年戶部勘會

紹興三年立六部架

閣庫

古今事實

各差一員

紹興十五年詔復置官吏部戶部各差一員禮部兵部
共差一員刑部工部各差二員以主管尚書某部架閣
為名

舊制有二

舊制官庀其司置于六部之內或遇其廢則以省郎兼之否則以監六部門兼之迨于紹興寺丞簿正官俱復然始庀司于外一也舊制金耀門文書庫多藏三司帳籍三司今版曹也自銓曹而下儲藏帳籍之所未之聞焉其後置六部架閣庫大抵成案留部二年然後畀而藏之又六年則入之金耀今金耀無復曩日則悉藏於架閣庫二也二者不同而至于諸曹二十四司之文章盡諸儲蓄以待有用則今猶昔也

論當世故

杜莘老字起莘以玠南一教授客中都見九重方更化
因上書執政執政偉其說薦為六部架閣明年彗見東
方公奏對直論當世之故語益切直遷為刪定

周書漢故

其任似周司書其選似漢掌故

古今文集

雜著

論架閣庫文字

周必大

臣聞先收圖籍者賢相之規模緣絕簿書者姦吏之常態今天下之事其來無窮故六曹文書鱗次山積紹興十五年五月初復主管架閣官逐部置庫凡文案皆謹藏之置都籍焉二十七年九月又詔文書已結絕過二年者以歲月先後分類字號編次架閣仍月輪逐曹郎官點檢具有無遺失申尚書省法意非不善也其如歲月滋久浸不加省屋宇踈漏風雨弗蔽至其甚則吏惡

害已而去其籍每見四方之人經部陳理身事者稍涉
歲月吏必以無案牘為解是豈可不申嚴舊法而為之
制哉臣愚欲望聖慈委逐部主掌官將所置都籍逐一
點勘每月赴部書押令郎官至期躬親檢察如紹興之
制仍置一般簿籍置藏於長貳廳以備參考間遇取索
案祖須郎官押帖子下主管官方許封送令餘人毋得
擅啟庶幾積弊稍革不失有司之職其庫屋踈漏者亦
乞降指揮早行修葺免致摧毀取進止

乞修架閣庫

周必大

臣先於淳熙二年十月內曾奏陳六部架閣庫文書浩繁屋宇損弊乞照紹興十五年置庫指揮嚴加整比及令有司早行修葺當時曾奉聖旨依奏其庫屋令臨安府檢則修葺經今又已四年近日輪郎官點檢則所謂屋者仰視乃與天通傍觀殆無壁落兩月前曾有人艤舟于岸偷竊吏部案卷勅黃之類欲載往外州作故紙出賣既覺察擒捕即投棄水中慢藏誨盜必至於此臣

愚欲望聖慈詔有司日下計料修整毋若往歲視為閒慢官司虛降指揮兼六部架閣主管官共四員自來臨安府應副居止若就庫側允換廨舍使其朝夕便於檢校免致疎失亦關防之要術也所有臣元劄子併錄在前今取進止

六部架閣廳壁記

綦更生

皇朝景德中置金耀門書庫貯三司文案隸尚書省架閣有庫蓋未嘗先省而始及部也崇寧大臣初二天官

建議置吏部架閣官其後六曹皆設繼廼省去訖宣和再置再省紹興三年六部悉有架閣庫十有五年置官四人禮兵一人刑工一人吏戶各一人曹始備官特詳於部而無復及於省矣省有留牘藏在諸房雖兩歲一遣架閣然屋室頽漏上雨旁風擲棄地間誰與顧省鼠噬蛛絲蒸鬱糜潰不可收拾吏有絕無才藝他司棄而不收者始竄名是間虛沾名俸而其身未始一到間有檢討漫然不知所存不得已而下取之部回還曲折稽

緩後時卒不可得朝廷深察其弊乃議建官即省闥之中維創以為庫初立廳事後植閣三間旁為兩翼蓋因修省之餘材窗疏壁寢既卑且漏不足以備充棟之藏架閣官綦更生首叨是選力請於朝得緡錢二千有畸增其閣十三共為十有六間列三省密院為四庫衍廳之宇挾而成五門內之右為饗室直房以便細事外門之左本庫地也今省府貸以為計簿房右復借為涸園皆未敢請復庫之門蓋直東出西則吳山右牆嚮南為

戶部度支左牆枕北當民居之道異時書多地狹尚可
相其便者而圖展焉三省密院之書既已各列一庫庫
列諸房自未置官以前者為一書置官以後其方來者
為一書歲月可稽門例無雜凡有前朝御筆者則朱箱
金瑣炷香而藏于閣之中所以見尊君之義也扁鐫森
嚴出納有籍規式詳備吏不得欺是真有益於官不可
謂緩而不切者也嘗觀唐六典書載亭長掌固兩属于
尚書省亭長主守省門通傳禁約掌固與亭長皆同番

上悉為省屬今嘉定甲戌朝廷既謂部有司門省則並
置明年乙亥以部有掌故省亦建官是唐朝之亭長掌
固與景德之省有書庫者今皆舉而復之矣傳曰修廢
官四方之政行焉是不容無紀用取架閣官姓名由今
洎後刻於下方嘉定九年三月吉日記

六部架閣庫題名記

李大異

皇朝肇建中臺分六官而設之屬文書之夥月益歲滋
枋在胥手並緣姦蠹識者病之崇寧間何公執中為吏

部侍郎始建議置吏部架閣官於是挿架萬數揭而目之前最後凡一索而獲人以為便後諸曹皆置官如吏部之制未幾悉省之迄宣和再置省紹興三年立六部架閣庫十五年復置官四人今四十七年矣異時百司庶府皆有款刻以識前後居官者茲獨因仍闕而未著紹興二年主管官王君次春陳君邕雷君孝友相與裒集題名三月題名成屬大異為之記大異竊惟古昔以來圖籍為重是官之建寔謹其藏其任似周司書其選

似漢掌故可以攷閱故新尋緒本元所謂若緩而急者
嘗試以舊章參之今日雖或稍異而其歸則同舊制官
庀其司置于六部之內或遇其廢則以郎省兼之否則
以監六部門兼之迨于紹興寺監簿正官俱復然始庀
司于外一也舊制金耀門文書庫多藏三司帳籍三司
今版曹也自銓曹而下儲藏帳籍之所未之詳焉其後
置六部架閣庫大抵成案留部二年然後畀而藏之又
八年則委之金耀今金耀無復曩日則悉藏於架閣庫

二也二者不同而至於諸曹二十四司之文書盡歸儲蓄以待有用則今猶昔也夫豈特文書為然惟官亦然故其職閒無事視他司為最自公退食得以挾冊讀書充其素業疇昔著定有缺多于此焉取之朝廷之於士可謂無負矣雖然凡士之處於世道積厥躬德足乎已者皆儲蓄之義也知此則無負於朝廷矣大異虛薄不足筭雖嘗居是官而於此有愧焉愧焉而復言之蓋自知其不能而將以懋夫能者也題名之作所以書名氏

紀歲月其有軼而不可攷者如嗣後之人續志之惟書
建官之本意以命鐫者

六部架閣續題名記

徐清叟

六部架閣置主管官周司書漢掌故遺意也國朝沿革
廢置李公大異紀載已詳不復贅竊惟是官之設豈特
掌若吏若戶若禮兵若刑工故牘而已哉凡庠序之英
科目之彥公卿大夫子弟之俊秀者朝家就有擢用必
儲以是職以待學官二令之闕其選至不輕而重然余

嘗摩娑石刻自南渡紹興以來至於今日凡百有餘年其間賢宰執名法從有焉給舍臺諫風采振揚者有焉擁麾節于外能以澄清摩撫為意者有焉得人維多而姓名黥黥與草木俱腐者亦未免有之然則居是官者詎可無以大是官歟寶祐元年春三月第四題名立石黃君叔度偕同列以余嘗主戶曹之籍囑余為之記辭不獲命乃作而言曰余老矣徒慙無補不足為故府重也諸君進未可量且職清事簡尚羊金耀之門會聚津

雲之閣盍亦相與講明立身行己之大方培養康時濟世之遠業求以無負明時之選掄者乎若夫攬簿書以爲能玩歲月以覲遷則非余之所望也衆曰唯因書以詔來者

六部架閣續題名記

朱貔孫

士君子生覆載間小而爲天下國家大而用天下國家要必有攸始也掌故其登朝之始乎國家置是官爲儲材地由是歷清要登貴顯者相踵孰正孰邪孰忠孰佞

攷之題名班如也羅君京子一日謁余而言曰故府題名又續石矣子嘗居是官幸與序其首余應之曰是石也豈將以矜名位而誇後世乎抑將以昭令德而垂無窮乎豈將以紀歲月而示久近乎抑將以著媿惡而寓鑒戒乎端純鯁鯨乃石之榮依阿苟容斯石之羞千載而下是非善惡皆於是乎求之噫可畏也雖然聲應氣求各從其類盛衰消長亦惟其時周之司書即今掌故是也當時不繫之他官而必屬之冢宰意有在矣方今

聖賢相逢登明選公實為諸君千一之遇盍勉厥始用
昌厥施庶斯石無玷而故府有光焉羅君曰然請書以

誌

古今事文類聚遺集卷五

欽定四庫全書

古今事文類聚遺集卷六

元富大用撰

寺監部遺

總九卿補新集諸寺部之首

歷代沿革夏制九卿商亦九卿周六官是為六卿又立

少師少傅少保是為三孤與六卿為九前漢百官志漢以

太常光祿勳衛尉太僕廷尉大鴻臚宗正大司農少

府亦謂之九寺大卿又置十二卿

執金吾大長秋將作大匠

後漢

分屬太尉司徒司空梁天監中象四時置十二卿春

卿

大常宗正司司農

夏卿

太府少府太僕

秋卿

衛尉廷尉大匠

冬卿

光祿鴻臚太舟

即都水

後魏置六卿

各有少卿

北齊謂之九寺隋唐因之龍

朔改名凡卿皆加正字

若太常卿為奉常正卿

後復舊又九寺

皆曰棘卿

見通典分紀

宋朝雖設九卿皆以為命官之

品秩而無職事元豐正名始有職掌中興以來併省

冗職除太常大理寺不罷外宗正以太常兼而衛尉

併兵部太僕併戶部太府司農併戶部光祿鴻臚併
禮部紹聖復置宗正太府司農餘遂廢

羣書要語卿慶也言國慶賴之

釋名

卿士惟月

書洪範

王

之卿六命

周禮

面三槐左九棘孤卿大夫位焉

外有九

室九卿朝焉

並同上

國卿君之貳也民之主也

君之卿

佐是謂股肱

並左傳

舉一國之高以為九卿

淮南子

恤我九

列注九卿也

韋玄成傳

曹太子來朝賓之以上卿禮也

左傳

宣王問卿曰有貴戚之卿有異姓之卿

孟子

九卿法北斗

紀公九卿法河海春秋漢九卿通寒暑晉志天子立三公九

卿所以順成其天道白虎通九卿位為列棘南史伊尹曰九

卿之事常在於德六卿分職以倡九牧九卿者所

以參三公也並說苑高冠兩梁入綴班於九列歲表類列卿

犀節

詩句獻納開東觀君王問長卿杜詩卿月昇金掌王春度

玉墀杜送馬大卿赴闕九寺名卿才思雄

古今事實

管仲授禮

齊侯使管夷吾平戎于王王以上卿之禮饗管仲仲受下卿之禮而還

敬仲辭位

齊侯使敬仲為卿辭曰羈旅之臣敢辱高位以速官謗不如臨貴

齊桓公使管仲治國對曰不如臨貴桓公以為上卿不如魏絳

晉悼公使張老為卿辭曰臣不如魏絳之智能治大官其仁可以利公室若在卿位內外必平

三珪之位

楚昭王進屠羊說以三珪之位謂三卿皆執珪

賜金百鎰

虞卿躡蹻擔簦一說趙孝成王賜金百鎰再見上卿

龜鈕犀印

漢官儀曰卿秩中二千石孝武令通官印方寸大龜鈕

又司馬彪漢書曰二千石以下至四百石佩兩印皆以黑犀

藻衣花綬

漢官儀曰衣裳卿大夫藻火綬青地桃花三彩又紈扇朱輪參差文映藻衣花綬焜燁生光

再登四至

濮陽段宏始事蓋侯信任宏官亦再登九卿

史記

前漢

許商善筭四至九卿

儒林傳

又續漢書汲黯姊之子司馬

安巧宦四至九卿

參決朝議

古之上卿次公一等至於西漢每與列侯參決朝議

主治萬事

三公比三星曰九卿主治萬事

號曰名卿

年容為大司農性明白號曰名卿

惟月象河

長慶元年給事韋景封還駙馬劉士涇為太僕卿制云
惟月膺名象河稱重

行有佩玉

後漢左雄言九卿位亞三事班在六官行有佩玉之節
動有庠序之式

身帶三綬

馬防位至九卿上絕席身帶三綬寵貴至盛也

籍田令

補新集司
農卿之後

歷代沿革周為甸師漢文帝感賈誼之言始開籍田置

令丞掌耕國廟社稷之田春始東耕於籍田祠先農

大賜三輔二百里孝弟力田三老帛種百穀收萬斛

立為籍田館穀皆以給祭天地宗廟群神之祀東漢

及魏闕晉武復置江左省宋元嘉中又置

通典

宋朝

掌帝籍耕耨出納之事五穀蔬果藏冰以待用

四朝志

元豐三年詔籍田令隸太常寺

續會要

渡江初闕紹興

十五年初除康與之為籍田令三十一年詔籍田司

權罷官吏並罷後復置

羣書要語春籍田而祈社稷也

詩

甸師掌帥其屬而耕

稱王籍以時入之以共蠶盛

詩句帝籍開千畝農功先九州王孫守耒耜吏隱極風

流永夏豐草木五雲衛郊丘

黃山谷

規地餘千畝三推示

勸耕廩犧猶故宇潑麥有新楹日至土膏動雲消泉脉
生城中苦羈束野徑得閒行

古今事實

天子親耕之禮

宣王不籍於千畝虢文公諫曰古者太史順時視土土氣震發農祥晨正先時九日太史告稷稷以告王乃使司徒咸戒公卿百吏庶民司空除壇于籍命農大夫咸戒農用先時五日即齋宮百官御事各即其齋三日王乃淳濯饗醴及期王裸鬯饗醴乃行百官庶民畢從及籍后稷監之膳夫農正陳籍禮太史贊王王耕一墾班三之庶人終於千畝其后稷省功太史監之司徒省民太

師監之畢宰夫陳饗王歆太牢班嘗之庶民終食是日也則徧戒百姓紀農協功曰陰陽分布震雷出滯土不備壅辟在司寇乃命其旅曰徇農師一之農正再之后稷三之司空四之司徒五之太保六之太師七之太史八之宗伯九之王則大徇耨穫亦如之民用莫不震動恪恭于農王弗聽

立表籍田賦

宋朝杜莘老蕙籍田司千畝皆上腴而歲取甚薄耕者

行賕以爭射吏每於歲首步頃畝視賕之厚薄為予奪
疆畝所接皆苦之至是舉故事請度田革老曰是無盈
縮安用度乃立表大書於四境且籍耕者賦耕田有定
數吏縮手不得傍近民感悅至今賴之

古今文集

雜著

籍田賦

王禹偁

臣謹按周制孟春之月天子親載耒耜躬耕籍田務本

勸農之道也所以事天地山川社稷先王醴酪粢盛于是乎取之恭之至也自周德下衰禮文殘缺故宣王之時有虢公之諫秦皇定霸鮮克由禮漢祖龍興日不暇給孝文孝景始復行焉昭帝弄田亦其義也後漢永平中明帝東巡耕于懷縣非古制焉魏氏親耕闕百官之禮蓋草創也晉武太始之年略修墜典宋文元嘉之代亦舉舊章齊用丁亥之辰梁以建卯之月後魏北齊公革有異隋朝唐室文物可觀太宗行之于前明皇繼之

于後自茲已降廢而不行將煥先農必待真主皇家享
國三十載陛下嗣位十四年武功已成文理已定乃下
明詔耕于東郊禮也百執于是悅隨三農以之知勸禮
官博士蹈舞而草儀甸師嗇夫歌詠而供職左拾遺王
禹偁再拜而颺言曰耕藉之義大矣哉千畝之田三推
之禮所以教諸侯而事上帝率人力而成歲功實邦國
之彞章皇王之大禮昔潘安仁賦之於晉岑文本頌
之于唐事美一時語留千載今王道行矣王籍修矣玄

功大業煥其有光宜昭頌聲以播樂府望闕拜手謹上
籍田賦一首雖不足形容盛德亦賤臣勤拳之至也其
辭曰十四年兮帝業昭宣寰區晏然乃順考於古道將
躬耕乎籍田務本勸農稽前文而備矣事神教養舉墜
典以行焉萬國歡心而懌懌百官供職以虔虔草儀注
於聖代議沿革於遺編築壇墀之三陛開阡陌之百廛
文物聲明合禮經而有度旌旗衣服應方色而不愆既
而屆孟春擇元日太史先奏天子將出是月也適人狗

路星鳥中律當東郊之迎春是東作之平秩皇帝于是
即齋宮辭帝室戒錫鑾嚴警蹕東青輅以有威儼朱紘
而無逸佩乎玉也懸藜之色蒼蒼載其旂焉干呂之雲
鬱鬱屬車負播殖之器後宮獻種桂之實洪縻黛耜服
葱牓以陸離縹輓紺轅駕蒼龍而飄歛太常之禮具舉
司農之屬各率畋師掌舍瞻御陌以惟嚴封人野廬設
壇宮而靡失于國之東千官景從風伯清塵而習習雨
師灑道以濛濛時也木德盛陽氣充春芒甲拆青青而

葱葱春土脉起油油而溶溶冠蓋蔽野環佩咽風狀浮
雲兮隨應龍旂幟張日車從塞空若衆星兮環紫宮修
農事以惕惕襲春服之重重爾乃配少昊祀先農尸祝
無愧豆籩以供太牢之牲薦之而肥腍太簇之樂奏之
而春容于是修帝籍勞聖躬撫御耦以無意履遊場而
有蹤將循乎千畝之際豈止于數步之中耕鉤耨之弄
田但矜兒戲修建康之春籍未煥農工有以見萬乘之
尊三推而舍或五或九降殺之義有倫爾公爾侯貴賤

之班相亞嗇夫灑種以斯畢庶人終耦而告罷千耦其
耕煥乎禮成播百穀兮率人力歌載芟兮揚頌聲將見
乎餘糧棲畝腐粟如京神倉令納其黍稷以備粢盛廩
義氏收其穰藁用餉犧牲親畎畝兮化被重人天而教
行自得訓農之資非貪慕古之名然後下青壇歸絳闕
百姓知勸羣后咸竭在鎬之宴啟歌虞之音發獻萬壽
兮歡呼奏九韶兮鏗越開三面以行惠宥五刑而慎罰
恩流於孝悌力田德被於雕題獬髮興五土之利固必

躬而必親同三代之風尚不矜而不伐大矣哉籍田之
禮豈三年而不為躬耕之義將百代而可知我所以舉
已墜之典立不刊之儀慮弗勤於四體將有害於三時
務農桑兮為政本興禮樂兮為教資民乃力穡歲無阻
饑神農斲木之功我其彰矣后稷播時之利我得行之
供巨鬯以斯在介豐年而有期丕顯事天之禮誕謨祈
社之詩祀山川兮神鑒昭矣配祖考兮德馨遠而永錫
純嘏用光孝思乃作頌曰倬彼東郊公田是闢大君戾

止言耕其籍帝籍既修爰及公侯親爾耒耜服爾田疇
言採黍稷祀于園丘億萬斯年以永天休又曰倬彼東
郊耕壇其崇大君戾止言訓其農農功既勗俾知榮辱
爾家以給爾人以足言奉蒸嘗徧于比屋億萬斯年以
介景福

籍田記

吳茲

臣嘗觀三代而上禮樂興行凡見聞者咸諭德意遷善
遠罪若固有之何其盛也蓋其動容周旋舉不外此身

教而力行先實而後名故民之從之也輕迨其末流隕
缺不嗣始以禮樂為虛器而世主莫或知其可用間有
願治慕古之君不過掇拾容典取其近似者而行之以
粉澤太平為美觀而已乃復當饋而嘆以為淳樸澆散
不可復追未若政刑之急於用也豈不悖哉竊惟神宗
皇帝睿聖生知輔以問學深達禮樂之情不牽不拘故
其典章之盛風俗之懿計筭成效莫與比隆雖臣愚不
足以識知盛德之所以然竊於籍田見之惟斯禮之不

講尚矣粵自號公大諫宣王不武寥寥史冊曠世一
書習傳頌嘆以為濶典國家承平百年五聖接武所以
教民敦本崇孝者甚備然千畝之禮未克是正即于東
郊實諸侯禮薦享之用取具臨時不蠲不虔神考是悼
乃詔有司度地國南溝塍廣袤務合於古屹屹崇壇先
農是祠耽耽齋宮於焉祗祓府史徒胥莫不備設統之
以令而隸于太常農祥晨正土長冒楨各揚所職無敢
不敬迨其西成嘉穀茂實鍾而藏之是為神廩上帝粢

盛於是乎出取為酒醴百禮既洽藁秸養牲牲則肥碩
蕭茅所供下逮果蓏凡歲時所以事天地宗廟者罔不
取足於是德馨所聞神其有不懷者乎風雨其時歲以
屢豐四方萬里是則是效昏于作勞捐弃末習和順輯
睦奉先以孝此誠二帝三王之盛節也與暫行以為美
觀者孰得孰失固不待較然未有載之文字刻于金石
者臣既撰次其事竊伏思念先皇帝既正王籍矣而未
遑三推之事意者留以遺陛下踵而成之乎伏惟皇帝

陛下繼志述事此駿惠我神考之烈行聞訓敕有司刺經錯事以舉雍熙明道之故則臣也望朱紘之光聽鸞輅之音作為歌詩以告成功而繼夫載芟之作其必有日矣臣謹記

籍田議

張凜

臣等前奏帝籍神倉國語宣王即政不籍千畝號公諫曰不可夫民之大事在農上帝之粢盛於是乎出王耕一墾庶人終於千畝廩于籍東南鍾而藏之注廩御廩

一名神倉東南生長之處鍾聚也謂為藏書所籍田以奉梁盛臣等看詳周禮甸師之職掌率其屬耨耨王籍以時入之以共梁盛詩之載芟春籍田而祈社稷宣王不籍千畝君子譏之春秋諸侯之國尚有御廩自漢及唐亦皆有帝籍神倉蓋先王于天地宗廟之事其醴酪粢盛之所出必專且潔然後可以盡其誠孝而交于神明今帝籍神倉久廢不設凡祭祀之所用皆索諸市非所以教潔誠也欲乞度地千畝設官掌之以供梁盛為

神倉于田之東南餘並略依古制為極嚴奉之意臣等再詳按周禮甸師耕甸王籍以其粢盛又前後漢南齊隋並有籍田令丞唐有廩犧令亦掌籍田之事今具立法下項

一乞下三司於京城東南標撥田千畝下太常寺舉官一員充籍田令專切管勾仍令所屬縣知佐同管勾所有召人耕種及合行事並委所管勾官擘畫申請施行

一乞下將作監以先農壇就籍田中建置并就田東南建立神倉及祠先農官齋之所其地在千畝之外別具圖子

秘書正字

補新集秘書監之後

歷代沿革後漢桓帝初置秘書監掌圖書古今文字考合同異其後監令掌圖籍之紀監述作之事不復專文字之任矣今之正字蓋令監之遺職校書之通制歷代無聞齊集書省有正書祕書省有正字隋唐因

之掌刊正文字其官資輕重與校書郎同貞元八年

屬集賢殿

通典

宋朝初為寄祿官元豐正名始實有職

事編集校定正其脫誤則正字主之

四朝志

建炎二年

罷紹興中復又參酌舊制必召試學士院而後命之

羣書要語亥之與豕涇渭難分魯之與魚溜澠莫辨

張鷟

集注云有人續史云三豕渡河子夏曰已亥渡河校之果然又簡牘磨滅以陶為陰以魚為魯

辨門閏

之非察陶陰之繆

同上注云左傳杜預據長歷此年無閏月當為門五日後人五土為合閏

遂以意定之

刊魯魚於往籍

唐牛僧孺制

亥豕有差魯魚為弊

續通

典長興三年
校經籍敕

是正文字之官實為儒學之選

南豐
撰制

瓊琚

玉佩久應接武於夔龍貝闕珠宮尚困守關之虎豹

詩句城南晁正字國器無等雙

黃山谷

詔謂正字當居中

楊誠齋送
蔡正字

又應芸閣吏恐我僻兼愚

古今事實

名播天下

唐蕭穎士天寶中為秘書正字于是裴耀卿席豫張均
宋遙常述皆先進器其才與鈞禮由是名播天下

海內文宗

陳子昂字伯玉初舉進士上書武后召見金華殿子昂貌柔野少威儀而占對慷慨擢蘭臺正字唐興文章承徐庾餘風天下祖尚子昂始變雅正初為感遇詩三十八章王適曰是必為海內文宗

通玄神童

吳通玄父道瓘為諸王太子授經通玄兄弟出入禁掖常侍太子遊通玄與兄邁微俱博學善屬文文彩綺麗

通玄幼應神童舉釋褐祕書正字

耀卿弱冠

裴耀卿少聰敏數歲解屬文應童子舉弱冠拜祕書正字

朋字未正

劉晏以神童為祕書省正字方年十歲慧悟過人上召入樓中貴妃置於膝上為施粉黛上問晏曰汝為正字正得幾字晏對曰餘字皆正惟朋字未正

守道安恬

宋朝洪文公遵除正字閣下多前輩皆以畏友待公明年春文惠公繼來縉紳榮之秦熈為祕郎勢焰赫赫公守道安恬留滯不遷

安恬靜默

范祖禹字淳父司馬光辟同編修資治通鑑書成上章稱薦曰臣誠不及也由臣頑固纂次淹久致其沉淪而祖禹安恬靜默若將終身者除祕書省正字

不附荆公

范祖禹除正字供職祕省時王荆公當國人皆奔競公未嘗往謁王安國與公友善嘗諭荆公意以公獨不親附故未進用公竟不往見

面試詩賦

晏元獻公殊年十三真宗面試詩賦疑其宿構明日再試文采愈美上大奇之即除祕書省正字令於龍圖閣讀書

文字生知

楊億字大年以童子召對試詩賦五篇下筆立成太宗
歎異以為祕書省正字制曰汝方髫齡不煩師訓精爽
神助文字生知越景絕塵一日千里予有望於汝也

對策見奇

廖正一字明略元祐中蘇軾在翰苑試館職士得正一
對策奇之除祕省正字

奏篇見稱

李璧撰周益公行狀召試館職奏篇上高宗見稱其文
諭丞相曰他日可令掌判正字

召試免試

紹興己卯諫官何溥請館職學官皆試而後除人以為
憚久之王十朋始以大魁直除祕書郎不試未幾闕員
寢多復召予與程大昌試止除正字其後無不試者至
乾道元年黃石輪對稱旨擢祕書郎仍特免試自廷魁
之外不試者惟石而已

侍從合薦

陳師道字無已號後山居士少好詩一見豫章盡焚其
藁而學焉元祐中侍從合薦于朝起為徐州教授改潁
州紹聖中以進非科第罷尋召為祕書省正字著後山
集十五卷

召試特命

韓駒字子蒼自布衣有詩名前輩稱許之政和初詣闕
上書召試中書特命以官除祕書省正字言者論其進

不繇科第謫為筦庫

文有氣燄

石悉字敏若政和初試中宏詞除館職四六之文有氣
燄而務奇恠為詩清逸有橘林集十卷

文頗富贍

劉弇字偉明儒學決科擢館職文詞頗似石敏若而頗
富贍不奇恠

古今文集

雜著

館閣送胡正字詩序

洪邁

前二年詔起胡先生於建安以司直廷尉先生辭曰臣
憲老矣春秋七十有四居山林莖莖自足官于朝非壯
有力而材者不可臣老矣誼不得奉詔天子攬其章換
以中祕書官使無累職事益自養先生不得辭句來來
數月又請曰臣不能使老復少今形容旅力又不逮在
前時而陛下留臣無為也於是宰相言胡憲半世為官

進不能以寸願加寵秩之益廣聖世貴老養賢之義即
日拜八品京官予祠祿使歸歸有日館閣之士八人舉
故事載酒殺祖之於國東門之外相屬賦詩番陽洪邁
獨拱手言曰先生之去美而其所以去則不可夫翹關
負乘擊劍馳馬加一日之老亦憊耳況過七十者乎至
於雍容在廷標榜後進坐乎安車蒲輪之上懼不能老
而已而先生去之是使黃髮皤皤之士終不一朝居也
且陛下擇官以處奉錢廩粟歲時諸恩澤甚厚非所謂

無人子思之側者滿朝賢大夫注意高仰無公孫子側目轅固之嫌儒生文士執弟子禮恐不得一解顏笑無有驪駒狗曲之誚而先生居之若不釋然者往來屑屑不憚煩於道路吾黨之士未有所聞於先生若之何同舍生喈曰疇昔之歲先生且對延英以病告上書公車卓卓然五千言今皆略施行其有補於朝廷多矣子之云云柰何邁竦然曰邁有罪酒闌以往諸公詩且成邁醉不遮愧不暇詩獨序其所以然者紹興三十一年二

月四日序

雜詩

簡孫正字

趙師秀

空齋兀兀難消日
況入中年睡亦疎
洗釜煮蔬留客飮
捲簾移菊看人鋤
秋衣因病全無袖
曉髮迎寒半脫梳
多謝貴交芸閣裏
許令隨意借官書

除秘書省正字

陳後山

扶老超嚴詔徐行
及聖時端能幾字
正敢恨十年遲益

畏金根繆寧辭溫溫媿況來憂畏斷不盡鹿門期

校書召試學士院絕句

王仲至

翠木陰陰白玉堂老來方此試文章宮簷日永揮毫罷
閒拂塵埃看畫墻

酬閻正字

李白

閻公漢庭舊沉疇富才力價重銅龍樓聲高重門側

古今事文類聚遺集卷六